

Osakidetzak etorkinei osasun txartela ukatzen diela salatu du SOS Arrazakeriak

Lana lortzeko baldintzetan jasaten duten diskriminazioaren aurka agertu da

Erredakzioa / Bilbo

SOS Arrazakeria taldeak Osakidetzaren jarrera salatu du, etorkinei osasun txartela edukitzea ukatzen dielako. Horrez gain, lan kontratuak izateko erabakia administrazioaren esku egotea ere kritikatu dute.

SOS ARRAZAKERIA erakundeak salatu duenez, etorkinek diskriminazioa eta bazterketa egoerak pairatzen dituzte. Horren adibide da Sos Arrazakeriaren esanetan, osasun txartela edukitzearen oinarriko eskubidea ukatzen zaiela. Hori dela eta, arrazakeriaren aurkako taldeak dei egin dio Eusko Jaurlaritzari etorkinei osasunerako duten eskubidea eza gut diezaiela.

Etorkinei lanpostu bat lortzeko jartzen zaizkien baldintzak eta bertokoei eskatzen zaizkienekin alderatuta, diskriminazioa eta bazterketa nabaria dela adierazi du SOS Arrazakeria erakundeak. Era berean, kontratatuak izateko erabakia administrazioaren esku egotea gaitzetsi dute.

Diego Jauregi eta Federico García SOS Arrazakeriako bozeramaileek egin zituzten kritika horiek, Espainiako Estatuan Arrazismoari buruzko 1999. Urteko Txos-



XOUSE SIMAL

Bilboko San Francisco auzoan Ertzaintzak etorkinekin duen jarrera ere salatu zuen atzo SOS Arrazakeriak.

tenaren aurkezpenean. Garciak Bilbon azaldu zuenez, Osakidetzak duela lau urte utzi zion etorkinei osasun txartelak emateari, nahiz eta iritzi publikoaren %60 etorkinei txartel hori ematearen aldeko diren. «Gobernuak peaje politikoa ordaindu behar badu arazo honetan, egin dezala, beste gai batzue-

kin egiten duen bezala», adierazi zuen Garciak.

Arrazakeriaren aurkako erakundeko kideek etorkinek dituzten kupoak ere kritikatu zituzten, Estatuek dituzten «diskriminazio tresnak» izaten jarraitzea onartezina delako haien ustez. Izan ere, etorkinen eskarien %25 baino ez dira arautzen.

Horrez gain, Bilboko San Francisco auzoan Ertzaintzak duen jarrera salatu du berriz ere, etorkinen oinarriko eskubideak etengabe urratzen baitituzte, SOS Arrazakeriaren iritziz. Hori dela eta, «etnozentrismo kulturalarekin» amai dezatela eskatu dute beste behin ere.

Bihar hasiko da Arakil-Uharten AHTren aurkako kanpaldia

■ Nafarroan ere eragin «txikitzailea» izango duela salatu dute

Erredakzioa / Donostia

GAUR hasi eta uztailaren 25a arte luzatuko da Abiadura Handiko Trenaren aurkako Asanbladak Nafarroako Sakanan antolatatu duen kanpaldia.

«Egitasmo txikitzaile horren itzala Nafarroara ere luzatzen ari delako» erabaki dute akanpada herrialde honetan egitea, Asanbladak ohar baten bidez atzo adierazi zuenez. Nafarroako Gobernuak ez ditu kontuan hartu AHTk ekarriko lituzkeen kalte ekologiko nahiz sozialak, Asanbladaren ustez. Gobernuak Ingurugiro Zerbitzuaren txosten baten arabera, AHTk «jarrera kritiko ugari» eragingo lituzke Aralar inguruan. Hala ere, Nafarroako Korridorearen eta Euskal Y-aren arteko lotunean tunel «izugarriak» zulatzea aurreikusten zen txostenean.

Akanpadan ekitaldi ugari egingo dira: taillerak, musika, hitzaldiak, natura-irteerak, proiektzioak, erakusketa informatiboak, antzerkia eta mota guztietako jaialdiak. AHTren auziaz gain, Nafarroako Energia Eolikoaren auziaz zein Lezo eta Errenteria arteko autobidearen aurkako ekintzen berri emango da.

ADEPFO Pirinioetako Formakuntza taldeak aktibitate berriak bultzatu nahi ditu

■ Elkarteko kideek urteko balantze baikorra egin dute atzo Izpuran batzartuta

Lutxi Fourcade / Izpura

ADEPFO Pirinioetako Garapenaren aldeko agentziak urteko biltzar nagusia egin du atzo Izpuran. Elkartea sortu zen 1981ean, mendiko gunen garapena sustatzeko formakuntzak eskaintzeko. Izan ere, elkarteko kideak ohartu ziren proiektu ekonomiko ugari ez zirela bideratzen formakuntza eskasez. Formakuntza egokia eskaini beharra ikusi zuten eta Pirinioetako hiru eskualdek onartu zuten agentzia sortzea.

Urtez urte, elkarrekin frogatu du benetako beharrari erantzuten ziola. Gaur egun,

hamar milioi liberako aurrekontua du eta 300 bat lanpostu sortzen laguntzen du urte guziz Pirinio katean. «Gutxi gorabehera, erran dezakegu 150 lanpostu berri sortzen direla eta beste 150 lanpostu ziurtatzen», adierazi zuen Roger Barrau agentziako lehendakariak.

ADEPFOren gaitasunak baliatuak izan dira proiektu ugari bidean jartzeko Euskal Herrian. Oro har, 31 bat ikastaldi antolatu ditu joan den urtean, gai franko hunkituz. Esaterako, euskal irratiek baliatu dute formakuntza programa berriketarien eta animatzaileen profesio-

naltasunaren bidean. Hamarika formakuntza antolatu dira laborantza mailan, batez ere aktibitate berriak sortzeko. «Ez da dudarik proiektu anitz eta bereziak agertzen direla Euskal Herrian, frogatuz hemengo biztanleen atxikimendua herriari», gaineratu zuen Barrauk.

Mugaz gaineko proiektuak bultzatzeko zailtasunak

Era berean, mugaz gaineko proiektu bat lagundu du ADEPFO elkarrekin, Sara, Ainhoa, Zugarramurdi eta Urdazubiren arteko elkarlan-



LUTXI FOURCADE

ADEPFO elkarteko kideak, atzo, Izpuran egindako batzarrean.

kidetza sendotzeko, Xareta izeneko proiektuan parte hartu baitu. Alabaina, mugaz gaineko proiektu bakarra izan zela deitoratu zuen agentziako lehendakariak. Izan ere, legedi ezberdinak

izanez, elkarrekin zailtasunak ditu mugaz bi aldeetako finantziarioak lortzeko. «Europako diru laguntzak banatzeko sistema aldatuko da eta espero dut egoera aldatuko dela», azpimarratu zuen.